

SVEČANO POLOŽEN KAMEN TEMELJAC

## Počela izgradnja dnevnog Centra u Dobrinju kod Visokog

Svečanim polaganjem kamena temeljca zvanično je započela izgradnja zgrade Dnevnog centra za djecu i odrasle osobe s posebnim potrebama u naselju Dobrinje kod Visokog. Polaganju kamena temeljca su prisustvovali, između ostalih, i ambasadorica SR Njemačke u BiH **Ulrike Maria Knotz**, privredni ataše Ambasade SR Njemačke **Florian Bukhardt**, premijer vlade ZDK **Fikret Plevljak**, ministrica finansija ZDK **Amra Babić**, ministar za socijalnu politiku i izbjeglice ZDK **Mirko Trifunović**, direktor organizacije „Lebenshilfe GmbH Plauen“ **Dietrich Kazmierzak**, predstavnik organizacije „Terra Tech Förderprojekte e.V.“ **Annika Rath**, predstavnik Udruženja „Humanost“, te načelnici općina Visoko, Breza, Kakanj, Olovo i Vareš. Izgradnju ovog centra koji će biti površine 1.200 kvadratnih metara finansiraju Ministarstvo za privrednu saradnju i razvoj Vlade SR Njemačke putem HO „Terra Tech“ i Udruženja „Humanost“, Vlada ZDK, Općina Visoko, te njemačka organizacija „Bild hilft e.V.“ putem Udruženja „Humanost“. Prema planu, Centar bi trebao biti izgrađen do jula 2012. godine, dok je otvorenje planirano za septembar iduće godine.

### Nove životne perspektive...

„Općina Visoko je u saradnji sa ZE-DO kantonom i Udruženjem „Humanost“ iz Zenice uspjela da obezbijedi sve pretpostavke za početka izgradnje Dnevnog centra. Izgradnjom ovog centra otvoriće se nove životne perspektive za stanovnike naših općina i to za djecu i mlade sa posebnim potrebama koji ne mogu pohađati redovni školski sistem, ali i za odrasle osobe sa posebnim potrebama koje do sada nisu osposobljene za rad. Prilikom odlučivanja o pri-



Premijer Plevljak i načelnik Alibegović položili kamen temeljac



Sa svečanosti: načelnik Alibegović, ambasadorica Ulrike Maria Knotz i premijer Plevljak

*„Neka na ovom mjestu nikne objekat koji će u živote onih koji će ga koristiti unijeti novu svjetlost, novu nadu i novi kvalitet života. Radi toga, svima onima koji su na bilo koji način doprinijeli da ova, prije svega humana i lijepa ideja dođe do početka realizacije, ja iskreno čestitam. To se posebno odnosi na Vladu Njemačke bez čije pomoći mi u ZE-DO kantonu zaista ne bi mogli napraviti.“ - poručio je premijer Plevljak.*

hvatanju projekta imali smo u vidu da će se i porodice ovih budućih korisnika rasteretiti i da će im se olakšati obavljanje svakodnevnih obaveza“, rekao je načelnik Visokog **Munib Alibegović**.

### Potpisani protokol garantuje održivost projekta

Održivost projekta je zagarantovana Protokolom koji su Vlada ZDK-a, nadležne općine i Udruženje „Humanost“ potpisali u augustu ove godine u Visokom, i kojim se predviđa da se tokom pi-

lotne faze implementacije projekta, koja bi trajala od septembra 2012. do septembra 2014. godine, Kanton i općine finansiraju 60% rada Centra, dok bi preostalih 40% finansirali strani donatori. Nakon završetka pilotne faze, lokalne strukture bi trebale u potpunosti preuzeti finansiranje rada Centra, kao što je to bio slučaj i sa Dnevnim centrom za djecu sa posebnim potrebama u Maglaju i Centrom za rani podsticaj razvoja i ranu intervenciju za djecu sa posebnim potrebama u Zenici.

Ciljna grupa Centra su osobe sa posebnim potrebama sa područja općina Visoko, Breza, Kakanj, Olovo i Vareš, i to djeca i mladi školskog uzrasta koji zbog svojih posebnih potreba ne mogu pohađati redovnu školu, te odrasle osobe sa posebnim potrebama koje nisu osposobljene za rad. Korisnicima školskog uzrasta Centar će pružati usluge individualnog terapijskog i grupnog odgojno-obrazovnog rada, dok će odraslim osobama omogućiti doedukaciju, rehabilitaciju i osposobljavanje za rad. **N.K.**